



Broj: 10-34-455-11-07/25.
Zenica, 17.12.2025. godine

Svim srednjim školama
na području Zeničko-dobojskog kantona
n/r direktora

PREDMET: Postupanje, traži se

Postupajući u skladu s dopisom Federalne uprave policije, akt broj: 11-04-3-4450 od 16.12.2025. godine, naslovljenog kao: „Zahtjev za hitno prosljeđivanje upozorenja roditeljima i upoznavanje učenika sa pravnim posljedicama nezakonite razmjene intimnog sadržaja“, Ministarstvo za obrazovanje, nauku, kulturu i sport Zeničko-dobojskog kantona vas obavještava da ste u obavezi postupiti u što kraćem vremenskom roku u skladu s dopisom i preporukama Federalne uprave policije koje vam dostavljamo u prilogu. Pri tome, naglašavamo da sve poduzete aktivnosti trebaju biti sastavni dio evidencije i dokumentacije škole, kojima ćete, u slučaju potrebe, dokazati svoje postupanje.

S poštovanjem,

Prilog:

- Akt Federalne uprave policije s priložima


DOSTAVLJENO:

1x Naslovu,
1x a/a, 03, 05



MINISTAR

Mirza Mušija



Broj: 11-04-3-4450
Datum: 16.12.2025. godine

e-mail:

FEDERALNO MINISTARSTVO OBRAZOVANJA I NAUKE

kabinet@fmon.gov.ba

MINISTARSTVO OBRAZOVANJA, NAUKE, KULTURE I SPORTA USK

obrazovanje@vladausk.ba

MINISTARSTVO PROSVJETE, ZNANOSTI, KULTURE I SPORTA PK

prosvjeta@zp.gov.ba

MINISTARSTVO OBRAZOVANJA I NAUKE TK

mon@tk.kim.ba

MINISTARSTVO ZA OBRAZOVANJE, NAUKU, KULTURU I SPORT ZDK

min.obrazovanje@zdk.ba

MINISTARSTVO ZA OBRAZOVANJE, MLADE, NAUKU, KULTURU I SPORT BPK

obrazovanje@bpkq.gov.ba

MINISTARSTVO OBRAZOVANJA, ZNANOSTI, MLADIH, KULTURE I ŠPORTA SBK

mozks@sbk-ksb.gov.ba

MINISTARSTVO OBRAZOVANJA, NAUKE, KULTURE I SPORTA HNK

monkshnk@tel.net.ba

MINISTARSTVO OBRAZOVANJA, ZNANOSTI, KULTURE I ŠPORTA ZHK

info@mozkszzh.gov.ba

MINISTARSTVO ZA ODGOJ I OBRAZOVANJE KS

mo@mo.ks.gov.ba

MINISTARSTVO ZNANOSTI, PROSVJETE, KULTURE I ŠPORTA K10 – LIVNO

mzpk@vladahbz.com

PREDMET: Zahtjev za hitno prosljeđivanje upozorenja roditeljima i upoznavanje učenika sa pravnim posljedicama nezakonite razmjene intimnog sadržaja; traži se

Poštovani,

Federalna uprava policije, postupajući u okviru svojih zakonskih nadležnosti u oblasti prevencije i suzbijanja krivičnih djela, a imajući u vidu sve učestalije slučajeve nezakonitog snimanja, posjedovanja, razmjene i daljnjeg širenja seksualno eksplicitnih fotografija i video-zapisa koji uključuju maloljetnike, obraća Vam se sa zahtjevom za hitno postupanje.

S obzirom na ozbiljnost navedenih pojava i njihove štetne posljedice po djecu i maloljetnike, Federalna uprava policije zahtijeva da se sadržaj upozorenja Federalne uprave policije, koje se odnosi na krivičnu odgovornost i zakonom propisane sankcije



za nezakonito snimanje, posjedovanje i distribuciju intimnih sadržaja koji uključuju djecu, bez odlaganja prosljedi svim osnovnim i srednjim školama na području Federacije Bosne i Hercegovine

Također zahtijevamo da se tekst upozorenja koji je sastavni dio ovog akta, kao prilog, obavezno pročita roditeljima i starateljima na prvim narednim roditeljskim sastancima, uz jasno naglašavanje njihove odgovornosti u pogledu nadzora nad digitalnim ponašanjem djece, kao i mogućih pravnih posljedica u slučaju nezakonitog postupanja, te da se isti prosljedi na viber/whatsapp grupe razrednih odjeljenja u kojima se nalaze roditelji.

Istovremeno zahtijevamo da se učenici, tokom časa odjeljske zajednice, upoznaju sa osnovnim porukama upozorenja i pravilima odgovornog ponašanja u digitalnom prostoru, koji je također sastavni dio ovog akta, na način primjeren njihovom uzrastu, s ciljem prevencije, zaštite i sprječavanja daljnjih zloupotreba.

Federalna uprava policije smatra da je obrazovni sistem ključan partner u prevenciji krivičnih djela nad djecom i maloljetnicima, te da jasno, pravovremeno i jedinstveno informisanje roditelja i učenika predstavlja nužnu mjeru zaštite djece i očuvanja njihove sigurnosti i dostojanstva.

Molimo Ministarstvo da Federalnu upravu policije obavijesti o poduzetim mjerama i realizaciji navedenih aktivnosti.

Federalna uprava policije ostaje na raspolaganju za stručnu podršku i saradnju u daljnjim preventivnim aktivnostima, u skladu sa važećim propisima.

S poštovanjem,

Prilozi:

- upozorenje za roditelje i staratelje
- upozorenje za učenike srednjih škola
- upozorenje za učenike 5-9. razreda osnovne škole
- upozorenje za učenike 1-4. razreda osnovne škole

V.D. DIREKTOR
(načelnik SKP-a)

GLAVNI INSPEKTOR

Eno Zlatković



PRILOG 1: UPOZORENJE ZA RODITELJE I STARATELJE

Poštovani roditelji,

Lično i institucionalno Vas upozoravam da svako snimanje, posjedovanje, razmjena ili daljnje širenje seksualno eksplicitnih fotografija i video-zapisa koji uključuju maloljetnike predstavlja krivično djelo. Činjenica da se radi o djeci istog uzrasta, navodnom pristanku ili „međusobnom povjerenju“ ne isključuje krivičnu odgovornost niti umanjuje ozbiljnost posljedica.

Evidentiran je porast slučajeva u kojima maloljetnici, usljed nepromišljenog digitalnog ponašanja, dolaze u direktan kontakt s policijom i tužilaštvom. U takvim situacijama dijete može istovremeno biti žrtva, ali i osumnjičeno lice, posebno kada se intimni sadržaj dalje prosljeđuje, čuva ili koristi za pritisak, ucjenu ili ponižavanje.

Jasno naglašavamo da važeći Krivični zakon Federacije Bosne i Hercegovine propisuje ozbiljne sankcije za krivična djela spolnog uznemiravanja, zloupotrebe seksualno eksplicitnih snimaka, uhođenja, prijetnji i drugih oblika digitalnog nasilja nad djecom, uključujući kazne zatvora i druge zakonom predviđene mjere.

Naročito ističemo da zastara za krivična djela počinjena na štetu djece počinje teći tek od trenutka kada dijete navrší punoljetstvo, što znači da posljedice ovakvih postupaka mogu imati dugoročan karakter i biti pravno relevantne i više godina nakon samog događaja.

Aktivna i odgovorna uloga roditelja u nadzoru digitalnog ponašanja djece nije stvar ličnog izbora, već ključna mjera zaštite. Izostanak razgovora, kontrole i jasnih granica povećava rizik od zloupotreba, ucjena, javnog sramoćenja i ozbiljnih posljedica po psihičko zdravlje i budućnost djeteta.

Federalna uprava policije upozorava da razmjena intimnih sadržaja među maloljetnicima nije bezazlena pojava niti „prolazna faza“. Svako dalje dijeljenje, čuvanje ili objavljivanje takvog sadržaja može predstavljati osnov za pokretanje krivičnog postupka.

Roditeljima se preporučuje da bez odlaganja razgovaraju sa djecom o odgovornom ponašanju u digitalnom prostoru, da budu upoznati s aplikacijama i komunikacijskim kanalima koje djeca koriste i da im jasno stave do znanja da je razmjena intimnih sadržaja zabranjena i opasna.

Federalna uprava policije će, u saradnji sa nadležnim tužilaštvima, postupati odlučno i bez izuzetaka u svim slučajevima saznanja o nezakonitom snimanju, posjedovanju ili dijeljenju intimnih sadržaja koji uključuju djecu.

Roditelji imaju ključnu ulogu u prevenciji. Pravovremena reakcija, razgovor i prijava nadležnim organima mogu spriječiti trajne posljedice po dijete, porodicu i širu zajednicu.

Federalna uprava policije ostaje nedvosmisleno posvećena zaštiti djece i poziva roditelje da ovo upozorenje shvate krajnje ozbiljno.

PRILOG 2: UPOZORENJE ZA UČENIKE SREDNJIH ŠKOLA

Dragi učenici,

Lično je važno da budete svjesni da snimanje, posjedovanje, slanje ili daljnje dijeljenje intimnih fotografija i video-zapisa koji uključuju maloljetnike predstavlja ozbiljno kršenje zakona. Bez obzira na to da li se radi o vezi, prijateljstvu ili navodnom pristanku, takvo ponašanje može imati ozbiljne i dugoročne posljedice.

Elektronski sadržaji ne nestaju onog trenutka kada ih pošaljete. Sve što se jednom podijeli putem interneta može biti sačuvano, kopirano i distribuirano bez vaše kontrole. Jedna nepromišljena odluka može dovesti do gubitka privatnosti, povjerenja i osjećaja sigurnosti, ali i do problema sa zakonom.

Jasno naglašavamo da dijeljenje tuđih intimnih sadržaja, čak i „iz šale“, iz ljutnje ili nakon prekida veze, predstavlja ozbiljno narušavanje privatnosti i dostojanstva druge osobe. Takvi postupci mogu dovesti do teških emocionalnih posljedica za žrtvu, ali i do pokretanja policijskih i tužilačkih postupaka protiv onih koji sadržaj dijele.

Ni pod kojim okolnostima ne treba tolerisati pritiske, prijetnje ili ucjene da se pošalju intimne fotografije ili snimci. Ako neko koristi poruke, slike ili snimke kako bi vas zastrašivao, kontrolisao ili ponizio, to nije vaša krivica i takvo ponašanje može predstavljati krivično djelo.

Ako se nađete u situaciji koja vas uznemirava ili plaši, važno je da odmah potražite pomoć. Obratite se roditeljima, razredniku, školskom pedagogu, psihologu ili policiji. Pravovremeno traženje pomoći može spriječiti dalju štetu i zaštititi vas od ozbiljnih posljedica.

Federalna uprava policije poručuje da digitalni prostor nije odvojen od stvarnog života i da ponašanje na internetu ima stvarne i ozbiljne posljedice. Odgovorno postupanje, poštivanje tuđe privatnosti i razmišljanje prije nego što nešto pošaljete ili podijelite predstavljaju osnov lične zrelosti i odgovornosti.

FEDERALNA UPRAVA POLICIJE